

## Тоосх кедж гаргългъиз хойр холван икдүлджәх бригад

Тоосх кедж гаргългъна Элст балгъсна заводт комсомольск-багъчудин 4 бригад кӧдлджәнә. Эн бригадст кӧдлджәх багъчуд балгъсна тосхлтд икәр тоосх кедж гаргъхин төлә шунлтта кевәр кӧдлджәнә.

Тоосхин заводт кӧдлджәх комсомольск-багъчудин 2-ч номертә бригад (бригадирнь үр А. Коноков) өдртән 8 мингън кирпич кедж гаргъх зурата, тер зурагъан давулдж кӱцәхин төлә комсомольцнр болн багъчуд социалистическ дӧрдә өргәр делгрүлснә ашд, эдн өдртән 10300 тоосх кедж гаргъна.

Үр Коноковин толгъалджах бригад кесн тоосхиг бешүр зӧӧдж тәвлгънә кӧдлмшин зураг хойр холван кӱцәнә. Келхд, үр Т. Иванова, А. Полякова, А. Худжуртаев, А. Савченко өдртән бешүр 800 тоосх зӧӧх зурата бийнь 10-12 мингън кирпич зӧӧцхәнә.

Эн комсомольск-багъчудин бригад кӧдлмшин дигинь өдр болгън хәләдж, альк бригад сәәнәр кӧдлджәнә, тер бригадт ВЛКСМ-н комитетин Улан туг өггднә.

Раствор кедг газрт бетон кедг 5 машин кӧдлджәнә. Эн раствори узел өдртән 40-50 машин раствор балгъсна тосхлтур йовулна. Раствор кедг узел бүкл смендән кӧдлхд, 60-70 кубометр элс, 8 тонн цемент, 6 тонн шаху дотл — раствор кедг машинүр орулдж кедж гаргъна.

Тоосх болн раствор кедж гаргългъна кӧдлмшт 32 комсомольцнр кӧдлджәнә. ВЛКСМ-н комитетин сегләтр үр Сармуткин Клим өдр болгън комсомольцнр болн багъчуд дунд цәәлгъврин кӧдлмш кенә. Комсомольск-багъчудин бригад, балгъсна тосхлтиг зогелт угагъар тоосх болн растворар теткхин төлә шундж кӧдлджәнә.

**А. ДЖЕВАЛДЫКОВ.**